



Finalmënter ân podü tó pert a n campionat provincial

La proposta da mète ince sö a La Val na scua-dra che toless pert al campionat pro-vin-zial ê stada bele da tröc' agn argomënt de discusciun danter i mēmbri dl'Uniun dl Sport. Le maiú problem, por gauja de chël che la proposta ne n'ê mai gnüda concreti-sada, ê zēnz'ater la mancianza de na plaza dal palè. L'Uniun dl Sport ne s'la odô nia fòra bela da messëi jì foradecá a se afité na plaza dl palè, cî che ess imprümadedüt si-gni--fiché n gran sforz finanziair mo ince de gran brîes por i sogadus da messëi jì vigni iade foradecá a se alenè y a soghé. Al ne n'ê gnanca saurí da ciafè envalgò daimprò na plaza dal palè da podèi afité.

Tl ann 1993 éra finalmënter stada tan inant. Tratan le mēis de jügn él gnü rové i laûrs prò la plaza dal palè tla zona dl sport "Plans" y atira s'á i funzionars dl'Uniun dl Sport dè da fá, lascian scrí íte la squadra al campionat "Trofê Banca Popolara".

Les origins de chësc campionat

Chësc campionat ê gnü metü a jì por le prüm iade tl ann 1980, sön scomenciadía de set squadre dl raiun da Porsenú, sciö-che alternativa al campionat federal, sot-metü al organich dla F.I.G.C. (Federa-zione Italiana Giuoco Calcio). Le campionat "Trofê Banca Popolara" á atíra albü n gran suzès y ê bëgnodü dantadüt danter les mēndres uniuns sportives, che ne podô nia se por-mète la partezipaziun al campionat federal. Mo ince trôpes de maius uniuns che â bele na squadra ti campionac' federai, tolô pert cun na secunda squadra a chësc campio-nat, ince deache i medemi sogadus podô soghé paralel te trames les competiziuns. Ann por ann s'âl slarié fòra sura düt Südtirol, arjunjon ti agn 90 le bel numer de 60 squadre partezipantes. Plücoater â i orga-nisadus ponsè ala partezipaziun de squadre dl tēmp lēde, mo le nivel de jüch y la determinaziun dles squadre ne se desfa-renziëia nia tröp dal campionat federal de 3. categoria.

Ciudí pa nia l'iscriziun al campionat federal?

La preferënza dl'U.S. La Val por chësc campionat dan da chël federal pò gní moti-va-da dantadüt por conscidraziuns de cara-ter finanziair. Al basta ponsè che l'iscriziun al campionat federal costâ 5 iadi tan co al ater campionat. An mëss ince dí che al gnê metü sò na squadra nòia, y degügn ne savô sce ara jê bun o mal y insciö ne orôn nia riscé massa na gran soma d'iscriziun. N'atra gauja ê chëra, che tla zona dl sport "Plans" n'êl te chël momënt nia ciamò gnü stlüt jö i laûrs por la costruziun dl frabicat sportîf cun i locai da se mudé. Por l'iscriziun al campio-nat federal ne foss chësta situaziun nia saurí gnüda azetada.

Insciö ân ponsè che por mëte man jêl dessigü bun la partezipaziun al campionat "Trofê Banca Populara", dantadüt porchël che i tröc sogauds jogh podess naôta se fá n pü' d'esperienza y ch'al podess se "formè n grup", sciöche al vëgn dí. I sogadus che ti agn passá - fina che La Val ne n'â ciamò degüna squadra - â soghé pro les scuadres di paîsc vijins che tolô pert ai campionac' fede-rai, ê sëgn indô gnüs zoruch. Ince tröc jogh che â soghé ti agn passá pro scuadres joniles dl'Alta Badia, da S. Martin, Rina y Mareo fajô sëgn pert dla squadra nòia y l'espe-riënza di agn passá ti á dessigü jovè a düc'. Podëi soghé por la squadra de sò paîsc nadè tí dá ai sogadus dessigü na maiú so-de-sfaziun co soghé por na squadra foresta.

Campionat 1993/94



La squadra é piada ía dër bun

La squadra gnê alenada da Pio Ploner che s'â fat na gran esperienza sogan tröc agn pro la squadra dl'Alta Badia. La scua-dra ê gnüda partida íte tl "girone" dla bassa Val de Puster, a chël ch'al tolô pert ciamò döes scuadres dla valada, Antermëia y La Plí.

L'entusiasm da mëte man ê sambëgn dër gran. Bele tla prüma partida, sogada a La Val cuntra la squadra da Kiens che â da-va--gné le campionat dal ann denant, á la for-ma-ziun jona da La Val desmostrè so valur sogan fòra n resultat de parité. La prüma por-düda é gnüda tla 5. partida cuntra Vintl, che ê te chël mo-mënt a ce dla tlassifica. Mo por-chël ne s'á la squadra nia lascè sciurè jö de moral, dava-gnan la domë-nia dô le derby cuntra Anter-mëia. Ala fin dla prüma pert dl campionat é la squadra rovada al 5. post tla tlassifica, tóch dô les mius scuadres. Le bi-lanz de 4 partides dava-gnades, 3 parejades y mâ döes pordüdes pò zënz'ater se lascè odëi.



L a squadra che á tut pert al prüm campionat „Trofê Banca Populara“ - impé da m

Ciamò damí s'á la squadra comportè tla se cun da pert dl campionat

La preparaziun ales partidas da d'ai-sciü-da comportâ sambëgn de gran difficul-tês, sce an pënsa che chilò da nos é les pla-zes dal palè curides de nêi fina ala fin de merz. Implü n'êl laôta nia ciamò gnü metü en funziun l'implant d'iluminaziun por la plaza dal palè.

Insciö é la prüma partida contra i prüms te tlassifica gnüda pordüda mala-mën-ter, mo spo ne n'êl plü mai gnü pordü fina la fin dl campionat. Tles partidas da d'aisciüda á la squadra da La Val arjunt le secund miú numer de punc' de dütes les scua-dres. Cun 6 partidas davagnades, 2 pa-re-jades y 1 na pordüda á la squadra desmo-strè d'éster buna da ti tigní pormez ince ai mius avversars.

La partida plü bela

Na partida che ne gnará nia desmen-tiada tan atira é chëra contra la squadra da Natz, sogada söla plaza dl sport "Plans". Dô le prüm tēmp soghé dër mal pordô la squadra da La Val por 3 a 0. Tl secund tēmp á i sogadus da La Val mostrè carater y á ôt sotissura la partida, dava-gnan inultima cun le resultat de 6 a 3 cun cater goi de Norbert Costabiei y dui de Arthur Frenes.

Ala fin dl campionat s'á la squadra plazè al 3. post, adüm cun la squadra da Natz. Cun n pü' plü de fortuna y magari cun n pü' plü d'esperienza, conscidran che la squadra ê dër jona, fóssera zēnz'ater jüda da rovè ti prüms dui posc' y da se cualifiché in-sciö por les finales provinciales. An mëss in-ce dí, che la squadra n'á pordü intratan düte le campionat degüna partida söla plaza de ciasa.

[Tlclassifica finala y resultac' dl campionat 1993/94 \(clicca\)](#)

Campionat 1994/95

Dô la bela esperiënza fata l'ann denant, á l'U.S. La Val tut pert le secund ann al campionat "Trofê Banca Populara". La scua-dra é indô gnüda alenada da Pio Ploner che fajô ince pert dla squadra sciöche sogadú. Le travêrt che an s'â metü dant al scomen-cia-mënt dl campionat ê chël de arjunje al-man-co indô le 3. post concuisté l'ann da de-nant. Mo tan bun ne n'éra nia plü jüda.

La prüma pert dl campionat

Dô che la formaziun da La Val â stlüt jö dër bun le campionat 1993/94, se compor-tán dër bun dantadüt tles partides da d'ai-sciü-da (6 davagnades, 2 parejades y 1 na por-düda), se aspetâ tröc che la squadra jüss ince indô tl campionat nü inant cun le medem ritm. Ince sce cun la prüma partida, da-vagnada 2:0 a Welsberg, che ê üna dles fa-vo-rides, é la squadra atira piada ía cun le dër pé, s'ân tles proscimes partides tosc intenü che ara ne jê nia plü tan saurí co l'ann da denant. Dô la prüma pert dl campionat s'á la squadra plazè al 6. post cun 12 punc': 3 partides davagnades, 3 pa-re-jades y 3 pordüdes (les partides dava-gna-des vël 3 punc'). Le comportamënt püch costant dla squadra é magari stè n pü' colpa dla desfortüna, mo al ê dessigü ciamò val' d'ater che falâ. Magari s'ân aspetè les còs-ses massa saurides, o magari él val' sogadus che ne s'á nia impegné indortüra, dant-adüt tla preparaziun ales partides.

La secunda pert dl campionat

Por les partidas da d'aisciüda â la squadra la poscibilitè da se alenè sciöch'al alda, deache al ê intratant gnü metü en fun-ziun l'implant d'iluminaziun sôla plaza dal palé "Plans". Chêsc ê dessigü n vantaje, che la squadra n'â nia albü fina sêgn.

Mo ince tla secunda pert dl campionat ne s'á le comportamënt instabil dla squadra nia miorè. An jê da na partida sogada dër bun a n'atra pordüda malamënter, zënza capí indortüra les gaujes. Implü él ciamò stè val' dezijiuns arbitrales dër discutables che á roviné deplü partidas che ess dessigü mirité n ater resultat. Fajon les somes, á la scua-dra cun les partidas da d'aisciüda (5 da-va-gnades, 1 parejada, 3 pordüdes) impò miorè la posiziun te tlassifica y á stlüt jö le campionat al 4. post. Sce an é impò rová tan alalt te tlassifica ince cun resultac' nia dër bugn, pò chêsc gní splighé cun le fat che te chêsc campionat ti ara a dütes les scua-dres scechè n iade o l'ater. Porchël éssel bastè n pice sforz implü por arjunje n bun plazamënt te tlassifica. Ala fin essel bastè na partida davagnada implü por arjunje le 2. post.

Al dess ince gní dit, che tla secunda pert dl campionat él stè dui di mius sogadus, Simon Dapoz y Romeo Rubatscher che é jüs a soghé pro la squadra da S. Martin, che tolò pert al campionat federal de 2. ca-te-goría. Ince sce te val' partidas an conesciü súa mancianza, pon dal'atra pert sambëgn ester cuntënc' che ëi á albü l'ocajiun da soghé te na categoría plü alta y da daidè portè prò al bun comportamënt dla squadra dl païsc vijin.

[Tlassifica finala y resultac' campionat 1994/95 \(clicca\)](#)